



Inatsisartunut ilaasortaq  
Peter Olsen  
Inuit Ataqtigiit

**Ingerlatseqatigiiffinnut akileraarut pillugu § 37 naapertorlugu apeqqu  
nr. 194/2018-imut akissut.**

27-08-2018  
Sags nr. 2018-3814

Inatsisartut suleriaasianni § 37, imm. 1 naapertorlugu matuma kinguliani allassimasunik Naalakkersuisunut apeqquaqarputit.

Postboks 1037  
3900 Nuuk  
Tlf. (+299) 34 50 00  
Fax (+299) 32 46 14  
E-mail: oed@nanoq.gl  
www.nanoq.gl

**1. Ingerlatseqatigiiffinnut akileraarut procenti ataaseq qanoq aningaasatigut naleqarpa?**

Ingerlatseqatigiiffinnut akileraarummit, ukiuni 2013-imit 2017-imut, iluanaarutit tamarmiusut katillugit ukiumoortumik 275 mio. aammalu 395 mio. koruunit akornanni iluanaarutaasimapput, tassani 6 % ilassut ilanngullugu.

Taamaattumik procentimit ataatsimit iluanaarutaasoq 2013-imi 8,7 mio. aammalu 12,5 mio. koruunit akornanniittumik annertussuseqarpoq.

Tamatuma saniatigut apeqqu 3-mut akissut innersuussutigineqarpoq. Tamatumani ingerlatseqatigiiffinnut akileraarutip nunatta karsiata kommunillu karsiisa akornanni qanoq agguataarneqartarnerat erseqqinnerusumik nassuiaatigineqarluni.

**2. Ingerlatseqatigiiffinnut akileraarutip 30 %-iusup affaannaangortinnissaanik Naalakkersuisut siunertaqarpat?**

Partiit Naalakkersuisooqatigiinnissamik isumaqatigiissutaanni, immikkoortoq 156-imi, ingerlatseqatigiiffinnut akileraarut appartinneqartussaasoq allassimavoq.

Ingerlatseqatigiiffinnut akileraarutit allanngortinneqarnissaata ingerlanneqarnissaani Aningaasaqarnermut Naalakkersuisutut siunnersuutit saqqummiussinissaq akisussaaffigaara.

Taamaattumillu siunnersuut taamaattup qanoq ilusilerneqarsinnaanera Aningaasaqarnermut Naalakkersuisoqarfik isumaliutigeqqullugu qinnuigaara,. Ttamatumalu peqatigisaanik Naalakkersuisooqatigiinnissamik isumaqatigiissummi akileraarusersueriaatsip pisariillisarneqarnissaa pillugu immikkoortoq 152, aammalu kommunit akornanni naligiinnerulernissaq pillugu immikkoortoq 155 eqqumaffiginiarneqarnissaat qinnutigalugu.

Siunnersuutaasinnaasut saqqummiutinnginnerini isumaliutigisat inernerit Naalakkersuisut susasaqartullu allat peqatigalugit oqaluuserineqaaqartussaapput.

Suliap tamassuma ingerlanneqarnissaa erseqqinnerusumik aalajangersarneqanngilaq.

**a. Akissut aappiuppat Naalakkersuisut suliffeqarfinnut akileraarutip affaannangortinnissaa qanoq iliorlutik piviusunngortinniarpaat?**

Apeqqu 1-imut akissut takuuk.

**3. Ingerlatseqatigiiffinnut akileraarutip affaannangortinneqaralarpat ingerlatseqatigiiffinnut akileraarutip qanoq annertutigisut nunatta karsiata annaassavai?**

Apeqqu 1-imut akissut naapertorlugu, ingerlatseqatigiiffinnut akileraarut affaannangortinneqassappat, tamanna pisortanut, Namminersorlutik Oqartussanut, kommuninullu ataatsimut isigalugit 130,5 mio. aammalu 187,5 mio. koruunit akornannik iluanaarutitigut annaasaqarfiussaaq.

Taakkunanga Namminersorlutik Oqartussat ukiumoortumik 87,7 mio. aamma 121,3 mio. koruunit akornanni, ukiuni 2013-imit 2017-imut, iluanaarutitigut annaasarisimassagaluarpaat.

Tassunga atatillugu oqaatigineqassaaq iluanaarutit siuliani taaneqartut ilaat ingerlatseqatigiiffinnit Namminersorlutik Oqartussanit pigineqartuni pissarsiarineqartarmata, tamatumani ingerlatseqatigiiffinnut taakkungannga akileraarut Nunatta Karsianut taamaallaat tuttarluni. Taamaattumillu iluanaarutitigut annaasaqartoqassagaluarpat ingerlatseqatigiiffiit Namminersorlutik Oqartussanit pigineqartut agguagarsiaqartitsinikkut akiliutaasa qaffannerisigut taakku tamakkiisumik ilaannakortumilluunniit taarserneqarnissaannut periarfissaqassaaq.

Taamaattumillu tassunga atatillugu ingerlatseqatigiiffinnut akileraarutit pillugit malittarisassat maanna atuuttut nalilersorneqarnissaanni allanngortinneqarsinnaanerannilu taama naliliinissami agguagarsititsinermi akileraarutinit malittarisassat, aammalu Namminersorlutik Oqartussani ingerlatseqatigiiffinnit agguagarsiaqarnermillu akileraarutaasut, kommunillu akornanni agguataarneqarnissaat ilanngullugit eqqarsaatigineqarnissaat pissusissamisuussaaq.

Aningaasaleeqqinnissaaq nutaamillu aningaasaliinissaaq siunertaralugu ingerlatseqatigiiffinni sinneqartoortut ilaannik immikkoortitsinissamut ingerlatseqatigiiffiit kajumissarneqarnissaat Ingerlatseqatigiiffinnut akileraarutip annikillisinneqarnerani anguniarneqartut ilagaat, taamaalilluni ingerlatseqatigiiffiit ineriartuunnaqqullugit aammalu inummut akileraarutit annertusinerisigut isumaginninnikkullu aningaasartuutit ikinnerulersinnerisigut inunnut ataasiakkaanut inuiaqatigiinnullu iluaqutaasumik suliffissat amerliartorsinnaaqqullugit.

Ullumikkut kommunit ingerlatseqatigiiffinnut akileraarutinit iluanaarutinit pissarsiassaat ukiumoortumik tunniunneqartarput aammalu agguagarsinikkut akileraarutinit pissarsiassaat ukiut affakkaarlugit tunniunneqartarlutik. Tamanna malillugu ukiumi agguataarneqareerneranni kommunini akileraartarnermik naligiissaarinermik aqqissuussinermut ilanngunneqartarput, taamaalilluni kommunit ingerlatseqatigiiffinnit akileraarutinit agguagarsiatigullu isertitanit annertuumik iluanaaruteqartut, iluanaarutimik taakku ilaannik kommuninut ingerlatseqatigiiffinnit iluanaarutinillu

akileraarutit annikinnerusumik iluanaaruteqartartunut tunniuttarlugit<sup>1</sup>. Pissutsit taamaanneranni ingerlatseqatigiiffinniit iluanaarutit, akileraarutit agguagarsiaqartitsinerillu, Nunatta Karsianut pissarsiassanngortinneqartarnissaat immaqalu kommuninut ataatsimoortumik tapiissutit aqutugalugit kommunit taarsiivigineqartarnissaat isumaliutigineqarsinnaavoq.

Siuliani allassimasut periutsimik pisariinnerujussuarmik paasiuminarnerusumillu pilersitsinikkut arlalinnik iluaquteqassaaq. Kommunit ukiumoortumik/ukioq affakkuutaartumik akiliiffigineqartarnatik ingerlaavartumik akiliiffigineqartalissapput. Taamaalippat kommunit siunissami ingerlatseqatigiiffinniit akileraarutit agguagarsiaqartitsinerillu isertitanit annaasaqaatinillu sunnerneqarunnaassapput, kiisalu kommunini akileraartarnermik naligiissaarinermik aqqissuussineq maanna atuuttoq pisariinnerulissalluni.

Siuliani allassimasut naliliissutaaginnarallarput aammalu suliaasaqarfimmi isumaliuteqaqqinnissamat ilaatinneqassallutik.

Naggasiullugu erseqqissaatigineqassaaq ingerlatseqatigiiffinnut iluanaarutinullu akileraarutit pillugit malittarisassat annertungaatsiarmata aammalu isiginiagassat amerlasuut misissoqqissaarneqassallutik, soorluttaaq ingerlatseqatigiiffinniit akileraarutit agguarsiaqartitsineriillu iluanaarutit siunissami akileraarutit taakkulu agguataarneqartarnerat pillugu inatsisissatut siunnersuummik saqqummiussisoqartinnagu susassaartut oqaloqatigineqaqqaartussaallutik.

Inussiarnersumik inuulluaqqusillunga



Pele Broberg

---

<sup>1</sup> Aammattaq innersuussutigineqarpoq tamanna pillugu nalunaarut sukkulluunniit atuuttoq. 2018-imi akileraarutitigut naligiissaanissaq aamma kommuninut ataatsimut akileraarutit agguataarneqarnissaa pillugit Namminersorlutik Oqartussat nalunaarutaanni nr. 14, 18. september 2017-imeersumi pissutsit taakku maanna maleruagassiorneqarput.